

# Марксистск-ленинск теорийиг гүүнәр дасхмн

Партийн сургъулин шин джил экллгън, цуг мана орнутгар ончта өдр—Алдр Октябрьск социалистическ революцин 40-ч өөнд белдлгън делгрдж йовх, кўч-көлсчир дунд агъу ик политическ болн производственн шунлт өсдж баях цагт болджана.

Партийн сургъулин түрүн занятсьн эн джил, советск обществин дөчн джилин эргцд уралан йовдж өсдж-өргджснд нерәдгддж кегдх зөвтә. Эн дигнь, КПСС-н ЦК-н пропагандин болн агитацин Отделин, КПСС-н ЦК-д баядг марксизм-ленинизм Институтин „Алдр Октябрьск социалистическ революцин 40-ч джилд“ нерәдсн тезисмүдт кегдв. Тиигәд политшколсин, кружоксин болн семинарсин сонъсач улс цугтан тезисмүдиг килмджән өгч, гүүнәр дасцахх зөвтә.

Мана партъ, энүнә Централън Комитет партийн сургъуль бүрдәхд цаньго ик оньган тәвнә. Эн учрар коммунистнр улсин идейн-политическ сургъмджинь өөдлүлдж, тедниг партийн йоста политическ даячирт хуврәх төрт партийн организац сулдхвр уга килмджән тусхаццахх зөвтә.

Нидн джилин сургъулин джилин дигнь партийн организац коммунистнрин идейн-политическ белдврин кирцәгъинь өөдлүлхд зөвәр көдлмш кўцәсинь үзүлв. Нидн джил политическ сургъуль бүрдәлгънд олзлгдсн янзс болн эв-аргъс зокалта сән болсмн. Ода болхла тедниг улм ясурулхмн.

Урдк мет, эн джил чигн кадрмудт экономическ сургъуль дасхлгънд ончта орм өгх кергтә. Эн кевәр пропагандиг советск обществин джиргъл-баядл тал өөрдүлдж

коммунистическ тосхлтин төрмүдин некврлә ирлцүлх кергтә. Экономическ школмудин, кружоксин болн семинарсин көдлмшт партийн организац тасрхан угагъар оньган өгх зөвтә.

Экономическ сургъуль дасхд оньган сулдхлго, партийн организац идеологин төрмүдт кемджән уга ик килмджән тәвх учрта. КПСС-н туудж, диалектическ болн историческ материализм, политическ экономий, марксистск-ленинск теорийин онц-онц төрмүд даслгън урдкас өргнәр, гүүнәр кегдх зөвтә.

Коммунистнр улс эврән бийснь политическ сургъуль даслгъна кергиг икәр ясурулхмн. Иим улсин то багъ биш. Дасдж йовх төрмүдәрн, дарандаранднь цугълрдж, хоорндан күүндвр кехлә ик туста болдгинь дамшлт үзүлнә. Эн учрар семинар гаргъх, лекц икәр умшдж өгх төр тәвгдджәнә.

Коммунистнрин идейн-теоретическ сургъульднь болн пропагандистнр улсин көдлмштнь партийн сургъмджин кабинетс болн библиотекс ик дөнъ-нөкдән күргх зөвтә.

Политическ сургъуль—партийн көдлмшин ончта нег аньгнь. Партийн комитетсин оньгнь энүнд өдр болгън тусх зөвтә. Марксизм-ленинизм тархалгънд, идеологическ көдлмш бүрдәлгънд оньг багъ тәвгддгиг төрүц уурулхмн. Партийн организацсин шуд нег кергнь—партийн пропагандин көдлмшиг унъгарнь ясурулгън болджана. Партийн пропагандин эркн төрнә—КПСС-н XX хургин тууджлгч шиидврмүд кўцәлгънд коммунистнрин болн цуг кўч-көлсчирин чидл-кўчинь тусхалгън болх зөвтә.